

Vijeće za implementaciju mira poziva na ponovno aktualiziranje ustavne reforme

Na sastanku održanom danas u Sarajevu, ambasadori Upravnog odbora Vijeća za implementaciju mira pozvali su stranke u BiH da ponovo usmjere energiju i napore na osiguranje reformi koje su ovoj zemlji hitno potrebne. Reforma Ustava BiH je svakako jedno od najosnovnijih pitanja jer je funkcionalna država od suštinskog značaja za budućnost ove zemlje u Evropi.

Upravni odbor Vijeća za implementaciju mira izrazio je veliku želju da novoizabrani političari u BiH nastave raditi na osnovu spremnosti koja je izražena u aprilu i brzo nastave proces ustavne reforme. Upravni odbor je pozdravio pozitivne komentare o nastavku reformi, koje su već dali vodeći političari. Paket ustavnih amandmana dobio je snažnu podršku međunarodne zajednice kao sredstvo za unapređenje trenutnog sistema u BiH. Usvajanje ovog paketa bi postavilo temelje za daljnji proces provođenja ustavne reforme radi stvaranja boljeg institucionalnog okvira za Bosnu i Hercegovinu na njenom putu ka Evropi.